

鹿
裘
石
室
集

鹿裘石室集卷第十一

宣城梅鼎祚禹金著

詩

五言律

送劉二怡獻還楚

歸客悵離群
楓林暮已紛
橐懸吳苑月
帆拾楚江雲
白雪歌難和
青藜照可分
芙蓉吾欲采
一寄洞庭君

內壽卿別之淮南

十年淮海路白首尚栖栖又送孤帆去愁看落日低聞鴻分楚塞折柳問隋隄我亦驅車別金陵大道西

送方伯書省覲歸閩

入洛名何忝年猶似陸機白雲閩海路綵服秣陵歸壁簡傳從古方言變已非音塵那易接秋鴈向南稀

金陵酒肆悼盛仲交

酒壚殊不遠似已隔山河况復聞鄰笛相看少

至御史中丞而理戎詰刑自亞卿陟八座幾三
十年宦轍歷趙魏燕冀齊魯鄒嶧以至龍子蠶
叢之國狐尾羊觜之鄉幾萬里凡所至被之者
如甘露如惠風如凜焉負霜雪如揭日月而行
望之者如五星之正色芒寒如北斗之斟酌四
氣蓋世有陳一力建一畫而竭蹶以趨焦心蒿
目不任其轂者徐公以無事處有事省若括轉
若樞三季不相汙治而五方不同風故雖聖智
不能爲時徐公錯則正施則行外而宣力內而

矢謨遠多疑近多懼甚哉運合之難也而徐公
然必信策必舉以茲觀徐公之於材何所不有
盡我

皇上之於徐公假便宜屏浮議西急羗徙而填
撫東急倭徙而筦樞亦何必盡之有而鼎小
子竊闕於公之微若俛焉有所不欲盡者當其
郎而衡士斥故相江陵子若弟不收已坐是東
撫東者帥泗上諸侯爲江陵請命岱宗公獨不
逞名伉直矣暨江陵敗嘗有忤者以自矜而公

逡逡引孫若忘前事者松潘越巂之討用兵若
神翦此而鼉食何難焉公特爲折首許薶奴與
更始先是銅梁張中丞之定浙亂也公以右轄
爲部分一一中機窾旣報上不預其勞比佐
邦政東事起公見爲勤師於遠非計曰吾聞以
夷攻夷也未聞以夷而致華然第密諗於主者
而不熾衆議以示長大校徐公材昌明而務惇
德量恒苞於畧之隅博大而務沉幾識恒超於
繫之表至若拾級而登則盈科之進一揖而退

則善刀之藏公用易高第其殆悟益之不如損而未濟之不可終窮者乎乙未月嘉平大撓紀年公甫周甲諸叔職方方直省魏令安吉守需次輦下以書來屬曰公雅好子言伯子翁仍以古文辭鳴雅善子且子輩獲潔觥親爲公壽吾亦藉脩辭於酌者鼎小子唯唯因敘次往臆如此前報之諸叔意以今天下不無虞矣中朝之璽書使節徇島酋於一行人之口重臣宿將以數十萬之師力易播酋之萬緡執秩者廼如傳

星浮塔散珠光曉池含劒氣秋且無催喚酒茶
盤客能留

至前夜同韓承志刺史阮時濟衛尉錢隱
君功父集張紉于宅

蓬蒿三徑約雞黍十年情月下梁間楊春回海
上城微言心共遠雅飲坐皆傾舊業遺吳市因
君卜隱成

汪子建毛豹孫沈伯宏王德操同汎石湖
蕭鼓出橫塘樓船下夕陽重湖相表裏列嶼帶

青蒼水市漁歌集郊臺霸跡荒鴟夷傳此逝萬
頃極茫茫

自治平過楞伽寺

上方鐘未歇餘響落楞伽湖氣吹山帶濤松生
午茶三冬稀見雪一雨徧成花爲禮隋朝塔前
因悟聚沙

治平寺尋王履吉讀書處

昔賢聊寄跡初地尚遺宮宛爾對脩竹蕭然生
遠風名何減驃騎書獨擅驚鴻能所終歸盡湖

波日夜東

夜過寒山寺覓藤梅

夜半鐘初罷寒山路漸通人投漁市火舟倚野
橋楓僧語蒙霜出茶煙帶月籠藤梅何嫋嫋香
氣曉隨風

泊吳江邀王承甫曹子念汪子建毛豹孫
過集

湖寬全繞縣潮縮屢移舟稻蟹多宜晚蓴鱸已
過秋虹梁疑渴飲瑤島似虛浮來就松陵酒烟

波浣客愁

王敬美松陵舟中同周公瑕王承甫毛豹
孫汪子建曹子念武君揚言別

畫鷁風鳴溜垂虹月映洲冰霜催歲宴杯酒惜
宵留閩俗人能學吳歌客且謳海邦春事早桃
李候巡游

雨過王德操持齋

白公堤畔路垂柳到門踈眇眇獨行處蕭蕭微
雨餘清齋謝何肉丈室倣龐居米汁猶存好逃

禪醉自如

虎丘同傳明府伯俊憩素師經堂

茂宰出郊舍生公設講場
每乘佳政暇彌覺道
心長翠挹松間雨寒留石際霜
風鈴空半起法語已琅琅

將過海上寄叔季豹季方弟子馬泰符

佳期曠何許薄游歌式微
相將浮海去轉覺望鄉非
旅食隨他意殘年惜落暉
吳閶新草色猶恐戀春衣

片月

片月刀環淚清霜王鏡顏名留雞口下身老馬
蹄間好隱誰營宅能來卽得山向傳三讓者被
髮入荆蠻

婁上訪王長公畱宿靖中三首

未見曾吟賞相尋已靖居共瞻龍護劒尚待鶴
傳書祕密三元錄飄飄八景輿靈氛真可挹直
恐卽冲虛

其二

耳應經歲順瞳是幾時方仙侶懷縣竹吾師在
廣桑障深惟綺語名大欲韜光但識真恬澹何
嫌住世長

其三

我常圖作佛公亦好求僊自有真源在俱非塵
世緣還拈作一處少別卽千年龕雪燈雙照中
宵對嗒然

趙汝師洗馬過王長公再同宿

靖師談出世宮傳語憂時三宿曾無礙雙襟併

有期春先沾栢酒凍已解梅枝如此寒暄意悠然後日思

臘月望夜蹇汝上憲使臺集

素書期濟水匹練過吳門控海軍容盛升堂客
禮尊酒杯殊自遠芻秣豈徒恩惠好原從昔彌
令此意敦

其二

良宵星更聚殘臘月能圓別夢關河杳驚心容
鬢遷琴樽淹累日鼓角下從天亦道霜威肅春

風入座偏

冬日弇園

吳地多名墅王園擬辟疆三弇分勝界一水劃
中央林老山容瘦波沈石氣蒼嚴寒出真意吾
不愛穠芳

其二

向背峰殊勢高深礪逐流樓臺相映帶竹栢互
綢繆洞窈窕遊操炬梁危住喚舟亦知由浚築恍
忽與神謀

其三

折旋原此地回顧儼他山峭蒨青蔥合千巖萬
壑間羽鱗皆有託花樹衆從攀惜別弇州路白
雲空往還

除夕周公瑕移具時聞后庭已有吉徵

此際多親宴誰能問遠賓勞君臨薄暮攜酒醉
生春生春酒名海日升何早吳雲望轉新芳馨先折
贈知有夢蘭人

甲申除夕寓吳遣懷

未定移家計仍淹異域身杯盤聊餞臘童稚競
憐春滄海又清淺青山只舊貧東風勤作意歸
及柳條新

其二

艱危猶誦往飄泊轉疑今自飽冰霜色誰窺天
地心聞鐘知午夜秉燭惜分陰森森五湖水臨
春思獨深

吳中同郭外兄守歲

三時同作客此夕復攜君水國陰常滿寒宵漏

不分歲增衣漸減愁劇酒難醺坐羨春城鴈雙
歸竺澤雲

新年戲況

雙檝鼓金閭春風逗客裳中流容與處已覺杜
蘅香紅袖江樓倚青帘水肆張誰能惜一醉行
樂乍當場

天池宿鍊魔道場自然法主

自然能合道道重使魔降池舊開蓮界師來建
寶幢巖雲敷上座水月印虛窓清極不成寐寒

鐘又幾撞

飲虎丘梁伯龍攜吹管唐叟見就

古隧堪悲地盤游更極歡客非折簡致山是入門看絲奏寧勝竹尊殘尚馥蘭林巖陰不薄春半換衣難

龍君揚以宣城事聽勘至吳攜酒出慰

北秦深持法南冠繫作囚骨銷由積毀頭搶復何求漢獄尊文吏吳邦識故侯當時悔失計西上有扁舟

其二

雅意非張楚煩冤擬哭秦勢窮蒙殺士難解重
交親太史靈堪質纍臣吠尚信客魂驚未定酒
或可寧神

雨後同劉端公子威泛虎丘餞余君房膳
部

藏書周柱史建禮漢郎官離緒縈攀柳行芳藉
握蘭過從有期契流汎屬清驪石上還留酌春
泥踏已乾

虎丘送君房膳部先以工曹出使遷

昔別敬亭暮春迴震澤陰使星朝北極佛日駐
東林筵膳供新直衢樽置滿斟遙知霄漢上初
地憶披襟

符卿郭公招過歸源莊

舊爲歸源菴

東道勞稱主南征憶視師韜鈴歸老祕泉石任
君爲招隱吳門市懷仙郭璞詩蓮花長蕩色釀
客手中卮

其二

沿洄隨綠薄皎潔映清潄藹藹柴桑里依依祇
樹林禽魚施朝食花葉寫春陰望杏將東作田
園趣轉深

答顧世叔寄訊吳中

贈婦翻投客還憐嫁女啼馬卿猶苦渴梅里舊
成棲花氣酣春困香魂殢雨迷往虛論意氣銷
盡向中閨

張左虞都尉酒間出伐檀集

關內功漕粟河干詠伐檀時平閒將略才壯寄

騷壇賦出驚神俊
觥飛快羽翰
倘然逢醉尉
何用故稱官

東歸畱別蹇開府

駘蕩春無賴
漂零日不禁
榆煙驚火改
柳色渡江深
拂軫思歸興
銜珠欲報心
有身難自薄
相許比南金

其二

北海賓傾坐
東方騎列行
君能存縞帶
我亦有衣裳
出借張融舫
歸輕陸賈裝
是山看不厭
家

更敬亭傷

其三

吹噓常欲上毛羽
竟成頽末契仍相托
漫遊非有期
名空塗衆耳說
僅解君頤每媿要
離輩猶將俠烈持

其四

鶯花迷客路
鰕菜飽行廚
歸已遲
春鴈遊真泛
水鳧別絃投
蜀國近
曲倚吳趨
一舸攜西子
翻教去五湖

句容還都過湯義仍奉常

句曲還相問交期自昔曾丁年嗟水逝已字說
山形耐酒秋先熟絺衣暑尚蒸更誰非執熱對
爾若懷冰

金陵秋日同王仲房郭次甫莫公遠孫齊
之鄔汝翼吳允兆姚伯道姚叔度余食
其王元方馬從甫謝少廉謝少白方嗣
宗潘景升劉俠君項仲連陸纂甫俞公
臨吳翁晉張去華趙幼安孫子喬許太

初叔季豹集雨花臺分得寒字

鄉杖從宜後朋簪合亦難來游越山海偉貌攝
衣冠陵氣霏霞曙江光浴日寒清秋一醺酒行
樂好更端

其二

臺迴夕流照林疎秋望寒雨殘花五色霜勁竹
千竿玉塵臨風把金輪映日看南都美游衍多
半在長干

其三

清尊餘戀晚翠袖薄生寒腓草猶堪藉幽蘭且
一彈醉偕興藻翰羣不入鵷鸞願使行光駐長
霄慧日歡

秋暮思歸

離心已堪軫况復感蕭辰風壤雖同候涼暄只
一身舖糜應與共嬌小轉須親杜曲春無賴那
能便殢人

秋夜同季豹叔過吳公擇駕部

亦自懷歸路因君緩客愁杯傾清署月菊老白

門秋憑局坐堪隱
遶庭行且謳
念茲同把臂
差擬入林游

金陵客懷八首

弃置勿復道
棲遲猶所宜
久應爲長物
未忍去明時
俗態殊遷次
羈魂漸放離
茫茫江海上
今日更何之

其二

恣意遊能數
多懷望轉迷
清秋雙闕外
佳氣二陵西
鴈已先霜下
烏仍近夜啼
都亭酒太惡
不

得醉如泥

其三

五陵然諾重四海弟兄親勝地多遙集清朝半
隱淪還聞音正始許可鑒人倫遠媿東都日林
宗折角巾

其四

先達名虛薦中人品實微因貧兼病得所貴自
知希白石歌頻變青雲附已非無勞問顓頊戰
勝頗能肥

其五

刀頭常改約膏首孰爲容桃葉空相接蓬根無
定蹤書傳新帛素衣准舊裁縫耿耿明河曙秋
雲隔幾重

其六

秋深諸病苦竟日禮醫王自入蓮花藏時聞麝
蔔香百千叅小品一指示迷方都講猶堪攝城
南古道場

其七

黑貂裘已敝留質酒家胡有客來不速其人美
且都華疏安楚歷妙竹比吳歛賴此堪陶寫憂
心日以蘇

其八

舊游如雨散寄跡共雲浮顰笑復何向去留非
自由橐垂多病日衾薄異鄉秋獨往平生意寧
甘與衆謀

丁休寧元甫偕萬婺源和父夜過時並覲
還經敝郡

春與啼鶯去宵傳結駟來燕雲猶護舄吳月對
銜杯比壤河能潤清時邑盡材看君有道氣白
嶽領丹臺

荅胡元瑞見寄因問其家藏書

良書傳穀水美酒念蘭陵許可詩相與心期醉
未能妙華搜洞簡商略對窻燈我欲分餘照鈔
傳爲制滕

春日得周國雍去秋宕渠書兼前上計所
寄詩且頒月俸書中問我東游事並荅

四詩

雪盡三巴水秋來萬里書寄時愁不達到日敢
論疎有語皆肝肺逢人得起居白門楊柳色只
似別君初

其二

常懷臨水送猶寄買山貲已後沃洲隱多慚剡
舍知漸開荒徑就聊守舊壇遺東瀼先賢宅移
家或可期

其三

北使逢君日緘詩阻驛程三年猶蜀道五馬入
燕京清徵歌頻變黃金詔屢旌廣游兼達宦獨
念過江情

其四

自君西上久東道我淹留越絕還偏記吳歌似
昔浮蓴羹千里味鰕菜五湖舟讀曲能無誤周
郎得顧不

送徐別駕遷守蘄州初令攸縣

吳楚連南服蘄黃控上游盈盈如帶水歷歷夢

刀州艾葉三年晚桃笙六月秋政成常卧閣江
漢詠風流

其二

三戶曾稱長雙旌載入疆笛寒湘浦月橘老洞
庭霜天地楚氛靖山川霸氣荒黃梅諸祖在講
席預名香

其三

自君爲郡日值我燕居時愛士延徐榻驚人攜
謝詩雲霞供視事日月戴恩私采采春江去將

無雜珮遺

月夜過黃渡赴子馬

春烟臨路發乘月汎潺湲寒影初沉樹清暉半
映山徑尋黃渡人人待碧雲閒慎重今宵酒三
年道路間

四月八日黃白仲自北至

金鷄帝里春寶象佛生辰解網修真戒窺牆悞
宋鄰青精令顏好白酒與交醇更說屠儀部歸
來亦道民

寄史仲弢僉事

每怪除書晚翻令謫籍新
聲名仍在衆蹤跡轉
疑人六月飛從息千秋氣不申
吾難論往事嘿
嘿付蒼旻

其二

憶昨輶車過曾傳尺素遙
離魂吳苑酒歸夢越
江潮懷璧君何罪償金世可調
所憐猶未釋放
逐在清朝

九日雨季豹錫予公衍泰符過集

草堂尊酒在終日坐林陰雖廢登高約聊舒望
遠心席移疎雨入衣薄蚤寒侵楚楚籬邊菊風
霜莫太深

歲除對酒懷三子

季豹攜婦金陵以貧失歸

久共成飄泊如君倍苦辛瞻雲親夢遠卒歲婦
愁貧不信今宵酒猶稱異地身依依白門柳莫
更解畱人

子馬周姬善事舅乃有所困先嘗以任

俠廢箸

歲往心徒壯宵征事益傷短轅將錫汝團扇且
羞郎酒券仍多積田園覺已荒辛盤聊不乏猶
喜進高堂

泰符在吾黨最少其家亦最約

吾應驚老大爾亦漸增年于世雖懷策躬畊尚
少田清齋惟業白好事每尊玄試飲屠蘇酒還
看在衆先

荅金壇鄧孺孝余小時嘗識其鄉曹太史

逢人歸白下爲爾問朱方
釣雪聊漁隱占星在帝傍
相期心獨遠誰意鬢俱蒼
茲更憐銅馬春波正淼茫

其二

丁卯詩初就庚寅賦轉悲
遙知能合調毋恨不同時
玉案何因報金山我所思
曹丘亦長者宛爾見風期

對亭菴贈羅伯符

曾叅寧遠幕還題司馬銘
多情寄粉黛餘事及

丹青倚醉言常誤呼顛筆有禪
栖隣半載手自施遺經

送羅伯符遊淮南訪馬司理廬州因懷黃
德卿中祕方使越

舊楚三江晚邊淮一葉秋送君成北首有客憶
南浮乍見黍禾秀相援桂樹幽絳紗懸帳待應
並馬融遊

送李文仲喪自宣城歸吳興

岱錄終相及仙踪竟莫攀誰能爲死友何用必

生還廣柳車前淚清茗鏡裏顏由來傳李白只
合葬青山

秋夜聽簫

玉簫空裏發乃出洞房幽夢遠初凝夜悽清併
入秋含嬌多掩抑倚曲故遲畱何必嬴臺上言
從帝女遊

丁亥季秋從弟子馬廢箸之後移家金陵
旣感遠別兼效微規

差異無家別相將盡室行壁存仍國寶金散信

人情丹闕安蓬戶滄江繞石城豈猶嫌簡略爾
意本藏名

其二

卽漸多悲氣而堪乍遠離倉皇散朋好急難屬
吾私無計能終挽有懷當自持百年憑祖德國
族聚于斯

其三

或似鵬南徙偏違鴈北來人言六月息獨抱九
秋哀骨肉難相保荆榛好旋開題詩獻康樂轉

憶惠連才

其四

此行殊慷慨
吾自欲沾巾
一別青楓暮
不歸芳草春
居閒宜謝客
身隱幸偕親
去日仍衣素
毋輕化洛塵

其五

激矢才堪遠
懸弧志不孤
非緣適樂土
寧遽哭窮途
奕世原名德
游閒豈壯圖
送君歌蟋蟀
良士戒瞿瞿

其六

朝市稱通隱舟航逐化居三閭詹尹卜七策計
然書勝負天難定浮沉日自如山田雖瘠土猶
望爾歸鋤

冬日同屠長卿汎城東長卿于舟中緋袍
作漁陽三搥

孤城懸縹緲一棹泝空明歲潦潮難落寒遲木
尚榮著緋幽鳥怪疊鼓蟄龍驚共指滄浪水冷
冷只獨清

其二

將歸且莫賦隨意得登臨去國青楓淚游仙白石心
林疎含籟淺月出映江深不暝前山色蒼然在客襟

得祁羨仲書寄匡夷錄

武夷九曲水匡廬九疊雲人間可哀唱淨土往生文
乞食奇能作傳書賞欲分臥遊終自媿圖壁響空聞

王長公司馬署齋同郭次甫余宗漢王承

甫徐茂吳陸成叔夜集

鈴閣吏稀警柴車客屢停淮清流夕照河白隱
秋星觴政援師律文心見典刑抱琴雖合奏真
賞獨泠泠

王園陪王長公攜酒看菊時公將乞歸

上林搖落候亦自有芳馨黃菊鋪金埒清尊倚
翠屏旣堪澆壘塊兼得制頽齡不淺東籬興秋
風颯可聽

攝山

龍蟠帶蔥鬱虎穴引嶙峋水繞僧分住巖開佛
化身空青逗玉乳虛白湧金輪千載來游地香
花夢宿因

其二

施宅明僧紹題碑江總持齊梁多佞佛神鬼亦
叅師鹿女疏泉供桐君譜藥遺無生猶未證且
與攝生宜

移居普德竹林簡次甫茂吳長干寺

去市俱依寺單棲偶異林一燈懸合夢雙樹接

分陰偕此白雲賞
泠然清籟音能來
無夜禁况復月初臨

西孚上人蕭蕭齋同恩公對月

共有祇林約支筇
月一方天清銷薄霧
地白挾微霜
桂影寒流榻竹聲
秋滿堂吾緣叅佛性
髣髴玉輪光

龍裘石室集卷第十一

終

鹿裘石室集卷第十二

宣城梅鼎祚禹金著

詩

五言律

南還宿江寧鎮

道路人堪老
秋風酒易清
歲登餘鴈食
江近賤魚羹
信宿雨如約
欲歸雲有情
出關逢故吏
多媿棄繻生

銅井雨行

殘夢猶堪續魂先馬首東山荒難辨雨樹老怯
鳴風早酒醉堪久泥塗問始通蓬蒿一畝地歸
豈少遺宮

南還道中與郭汝堅外兄

別有看花眼空瞻京洛春
宜予頻放落累爾亦
風塵衰白積成老
憂歡併在身
耦耕今定計
烟火本比隣

采石宿江上人家

一室聊棲葦長江盡帶楓
漁村隣北道蟹市罷

西風帆倚殘暉落門沿別渚通客愁何可道問
酒復囊空

謫仙樓謁青蓮遺像

丹青雖恍惚遺像肅千秋骨蛻猶疑塚神來或
倚樓世遙懸定論國亂屈名流一片滄江地予
胡亦滯留

通上人少本貴介有室以病去爲方外游
施祕藥而善飲酒其去宣城贈之

濁世本翩翩空門笠杖懸姬人怨服散醉客愛

逃禪小果緣隨結長桑遇卽傳敬亭爲別暮吾
擬碧雲篇

吳翁晉自新都至金陵同子馬集流波館
漸水新秋至秦淮舊曲深拂衣殘岳色促坐入
波陰積別暗成老相依細續吟哀箏方潤耳不
醉一何心

流波館再同翁晉子馬分得花字

朝出臨長陌宵遊更狹斜
牕調能語鳥杯汎駐
齡花闌雨魂傾夢歸雲望憶家
自然銷歲月

帝里舊繁華

金陵九日

佳麗六朝地登陵九日山
授衣游子候如玉美人顏
隔歲萸堪把深秋草尚斑
東籬吟自好無事馬蹄間

感懷答麻如水吏部

何戀此微名空懷出世情
君才驅上駟吾倦請長纓
白水歌應苦青山氣自平
有無登啓事久矣習嵇生

送順公還吳寄王百穀

自得清涼界因乘溽暑征禪心無住著游脚有
歸程宛水浮杯小吳雲托鉢生松枝東向處知
是舊經行

其二

語語王居士南游一衲偕詩曾叅半偈酒不廢
長齋墨沼傳鷺帖巖棲傲鹿柴經壇松漸古吾
擬試青鞵

圩莊省稼

田家何所有鷄黍具賓筵歲事猶難卜農談近
自然稻花晴愛日楊葉晚生煙更約重來處秋
風社鼓前

蒲上齋後泰符攜具集鄒士華有感

解齋猶怯酒對爾更悽然舊雨成星散新秋見
月圓畏人將避地問客有談天掉臂難輕去非
關戀薄田

進艇宛水登響山

放舟宛谿水一登嚴子臺斯人不可見孤思若

爲裁流雲幽抱石落日淨銜杯吾亦忘機者羣
鷗鏡裏來

鄧孺孝過新都訪汪司馬因登白嶽遠適
天台賦此送之

山水新安好秋行况益嘉青油驃騎府白嶽羽
人家鄉味攜櫻筍賓筵就菊花聞君更乘興東
訪赤城霞

凜秋四首

有引

凜哉秋氣良不自持屬且門庭多故譏侮荐

起夜之末矣邛風見愠具有是篇

凜哉催盡興獨夜耿抽思莽伏經多歲灰然冀
有期含光囊底劒苦色鏡中絲叢菊知何意霜
花綻滿籬

其二

畏影安從避修形轉自嗤微生給馬磨彼意在
鷄尸止水波仍作傾柯葉易危念彼棲棲者居
夷從鳳嬉

其三

柳下慙從昔蘆中渡以曉星言工翕舌風氣怒
成噫帶約非全病弓懸遂厚疑羈提曾受記調
達亦吾師

其四

家風潘岳詠祖德謝公詩族大應宜別門衰不
可支素絲悲有日朱紱重于斯寄語寬斤斧根
株尚弗移

過白洋園訪恩公悅公

應知白蓮社重闢白洋天勺水能成定疎枝盡

挂禪入林雙大士出世一因緣道果無年歷燈
燈指共傳

送辰甫叔守安吉

幾舍臨苕水中朝領竹符桑蠶有餘稅車騎一
何都天目探金檢冰心映玉壺東南多旱魃時
雨詠來蘇

感事示泰符四首時屏居余所且將爲楚
遊矣

杜門一以久蹈海更何期聞使原無耳深文欲

眉石室集卷十二
六
察眉窮非能五技讒實畏三尸廣柳千秋淚還
知客者誰

其二

肯爲無衣賦寧要約矢書虛弦驚孽鳥涸轍泣
枯魚難後形容變時移骨肉疎我生亦有命未
必盡由渠

其三

每憶賢星聚高陽跡尚存風流與文采竝世復
同門雲月東山展歌鐘北海尊祇今餘我爾長

被識涼溫

其四

念子疲奔命雖余多戒心在懷疑白壁有口鑠
黃金爲谷居宜下蹊田罪太深羈魂招且續楚
地有楓林

泰符入楚寄答陶懋中先是書來述棲霞
之遊偕方子及余也

逢君發高唱始作攝山遊千佛傳衣約諸郎撲
被畱宮雲談促曙湖月醉臨秋一作南遷客黃

州最上頭

其二

十年猶佐郡千里肯傳書宦薄情隨減交親賤
不疎自憐摧羽翼雅意負吹噓彈鋏西來客官
廚食有魚

送顧子胤廣文赴東郡

馬首東何日江春柳乍榮一經隨宦蹟四姓起
家聲嶽色開壇近河流映郭明先生天下士不
必射書名

奉寄左司馬汪長公八首兼爲呂吏部請

古樂苑序

登龍曾竊幸繡虎謬題才書憶南皮會尊要西
第開白榆天上種青鳥日邊來爲問軒轅鼎丹
梯陟玉臺

其二

耆舊風流盡繁音正始難天心畱碩果衆好適
芳蘭誰代江湖長公懷社稷安景光宜自愛長
跼祝加餐

其三

清齋非佞佛義解實精禪
龍象隨時見貂蟬應
世緣朝衣分緝衲賜劒別生蓮
瓢笠吾叅侍心
燈或望然

其四

脩社星榆聚登壇日羽麾
名流從授簡愛弟和
吹篴海嶽盟逾固東南力盡支
自慚惟一旅猶
許勝偏師

其五

羽陵聞簡蠹赤水有珠探象緯千雙管乾坤閱
太函經成緣尹喜玄出待桓譚詎識良工苦還
誰好我甘

其六

聞發金陵興思陪玉節遊柳花香壓酒桃葉艷
維舟雲外青藜杖風前紫綺裘瓦官碑碣在三
日爲公畱

其七

卜商傳四始玄晏重三都聲氣關元化謳謠肇

帝圖樂書原逸草肉譜久成蕪一序開先覺千
秋作後模

其八

舊密傳衣約胡難負笈從力疲奔命數鬢變判
愁供鱗甲多興口春鉏半在胸叩關尋有日願
且緩泥封

北上宿江寧驛

驛道控江津離家未浹旬草封春望遠松放月
窺人戍鼓多無次官醪薄尚醇征夫懷往路何

敢避車塵

江淮道中卽事却寄南都同遊

江淮距九驛車馬屬三陲久已疲供億因之感
路岐人煙幾簇小春雨一犁遲更聽睢陽笛悽
然有所思

其二

營窟疑今在茅茨自古遺近河多濁水曠野間
青枝雪黍聊稱酒炊沙實作糜江南行樂地年
少好相持

王莊驛卽事戲贈吳中小史

正憶吳儂好因多小史情
方言寧化枳鄉曲乍班荆
海錯隨時數園茶舊法烹
北來塵暗眼藉汝得雙清

渡河

德水天分派濁流春試臨
尋源漢使杳疏鑿禹功深
積氣虛沈壁浮光潯躍金
中流乏舟楫欲濟自吾心

其二

舳艫千里接芻粟萬方來外府東南力如林郡
國材浮涇勞未止遮海議應開更擬金城策親
承 聖主裁

徐州寄內

人今更北渡書始寄南徐惜客縣遲換思君帶
有餘春歸千里外月閏兩輪初尚有前期在臨
河轉跂予

道中憶亡女

未暇生離苦憐伊死別真鉛華無固質骨肉一

微塵芳草新畱塚他山獨赴人猶餘孤客淚遠
道薦殘春

夏日張澤民太常邀過摩訶庵

爲君吟萬玉曾愛彼中眠闕外花霏地江南竹
醉天微風催解帶定水度鳴絃攜得齋廚酒畱
酣繡佛前

其二

畏日斜依薄慈雲迴接隣僧忙常好事官暇有
閒賓饌雜供蒲淨談叅噉蔗新由來祇樹下映

蔭幾何人

五日過何仁仲鴻臚聞石門失守

君園有采芳洲

索余詩

楚人多善怨弔屈在他鄉蒲泛聊隨俗蘭薰憶
采芳燕雲臨夏赤塞日暈沙黃昨報漁陽警兵
符辟不祥

俞孟武吳允兆潘景升顧泰初夏晚集華
起光秘書

襜襖呵從昔君嫌客過稀泉香來水遞林密苑

炎威談拂時能豎歌塵暗欲飛鳳皇池上草芳
歇尚霏霏

七夕同何仁仲詹錄龍君善博士李汝藩
嗣侯楊德潤孝廉宗長客生侍御集朱
汝修脩竹館

獨客懷靈匹星筵醉復畱蕭蕭脩竹夜歷歷白
榆秋隔歲期難數新涼病漸瘳明河吾欲賦烏
鵲不勝愁

泰符弟自楚至京

送汝昨殘年離筵積雪前避人非避世遊楚復
遊燕河漢佳期過風塵壯色遷轉憐飛燕影南
向欲聯翩

送趙仁父廷評告還膠東

扶桑堪一望初日映東隅海氣眉光動秋風肺
病蘇竹書辭聽棘菊酒遞供莧向夕青門別回
憐客影孤

仁父買馬及二劍以歸賦此壯之時薊遼
方有倭備

躍馬劒歌雄諸昆烈士風懸金圖按駿裝玉匣
藏虹望氣占遼左隨雲卧海東營平有遺勩毋
學賦徒工

鄒孚如考功招同呂玉繩司封集廖常侍
園

蟾光欲上弦燕賞藉中涓近御瞻天咫爲園選
地偏林陰疎碧柳石氣吐青蓮未覺山王貴交
深把臂前

其二

一自吹鄒律能回黍谷寒因之攀呂駕兼託竹林歡識曲歌翻譜移尊食換單淹留寧爲此談劇惜宵闌

鄉人歸致家書

客中重鄉曲放後嬾家書海汛鯨鯢迫田禾鴈鶩餘夢危經涉遠名好轉成虛吾土風雖惡京華不易居

愚公順公見過因懷長干恩公

向授長干記俄從上苑逢共稱大小朗誰識去

來蹤讚唄叅燕調香花出御供南雲時在望江
水夢秋重

九月八日卓漱甫光祿集送學公自五臺
還鹽官同俞孟武程孟孺朱汝修安未
央弟泰符分得微字

登臨明日約遙集送將歸海路東南求吳霜九
月稀清涼曾止錫淒冷漸添衣叢菊當筵發拈
花一笑微

別顧仲韓還上海

長安游俠窟才氣獨推君
蹀躞青絲騎淋漓白練裙
賣珠兒似玉障日女如雲
別後思公子江南陌草薰

孫文融銀臺再集廖園同殷職方無美呂

司封玉繩

茲境空頻醉相招本宿知
林園增勝槩休沐值熙時
僑盼堪羣彥清通自我師
孫興不淺流石有幽期

郊後太常海陵陳公招集天壇道院

瑶壇懸壁月流彩應清卿子候天心見朝來地
主迎酒仍官法釀味襍海鄉名釣樂猶遺奏寥
空響鳳笙

其二

每憶趨庭處霞標界瀑流乍欣張宴日雲氣接
僊游羽爵飛騰迅逢衣禮數優自非期會客留
轄未須投

臨淮李母徐太夫人挽歌

五等圭封儷三朝鼎養隆女宗遺內範 帝卹

寵元戎象衛崇班備鴻銘命世工祁連虛合冢
僊躅易遷宮

其二

國胄兼燕北家聲振隴西霜華沈鳳彩風樹急
烏啼引紼傾都出凝笳列校齊已勤彤管述

鸞詔 御親題

其三

堂護摧委露營柳慘含烟畫扇猶存笥容衣遽
設筵金蠶春獨闕玉鵲世仍傳賜地鍾陵近千

秋白日懸

送大宗伯于公告致東歸

時以催請建儲作旨

一歸存國本何意薄榮名輿頌推高尚君恩
念老成乘桴滄海汎辟穀赤松行舒卷從雲氣
終無點太清

其二

日講侍親臨天顏戀別深星辰從曳履泉石乍
投簪出處明完璧親朋散賜金卧龍堅未可
須起作商霖

其三

鸞輿天北極鶴駕日重輪羽翼圖難就鋒鱗逆
屢申畏名封禁策揮手謝朝紳九廟威靈在
應扶社稷身

其四

地脉將虞絕天心未易窺歲時仍曠潦海島滿
旌麾賢路爭相避官曹補漸遲送公因撫事吾
以卜安危

袁文毅戶曹注籍以令子德孺迎客

趨曹違長吏典謁屬諸郎沈醴秋逾碧疎花露
惜黃子常稱善病我自愛遺狂角枕還相戲何
妨直踞牀

送郎元白歸吳興郎嘗有先隴之難

掉臂出西京相看氣不平汝應歌獨漉誰爲植
孤生已蹋雲霄翼空懷霜露情歸愁馬鬣地孤
兔尚縱橫

都下寄季豹

誰無故鄉憶况復平生親鷁首尊初暖龍溪波

尚春年光爭過客秋氣易悲人不待貂裘敝方
知悔入秦

送桐廬趙孟清侍赴卽墨少府

羨子衣純采從親綬乍黃望鄉星是客臨縣海
爲王若木三更日梅花十月霜田橫多義士島
氣尚飛揚

周子春戶曹何仁仲詹錄安小范膳部飲
屠田叔諮議臯榆館有所納調及之

書久踰秋約尊堪卜夜呼霜暄遲禁柳星曉散

臯榆海錯遙從越鄉音半雜吳新人美燕玉生
晚合朝盧

冬日遊西山同泰符

寒色今如許山靈昔有期深情堪一往觸目已
多奇湖急氷間溜松妍雪後枝鳳城西去路處
處白雲隨

早過極樂寺看松見顧仲韓爲芳上人題
畫有懷

古寺松宜畫曾聞顧虎頭丹青猶滿壁歲月阻

同遊秀色餐能飽朝華映欲流老僧相見說倚
醉爲予畱

倦遊

弧矢雖初志榆枋有故枝未游先已倦涉遠擬
何爲鄉信來期過羈魂歸夢危馬頭初上月不
得映纖眉

投臥佛寺

墟烟輕作暝山氣易爲陰一徑荒榛入雙林古
栢深地磽僧簡供寒重客稀臨鐘磬坐成寂冷

然空外音

香山宿來青軒

翠色連雲迴俄窺衆壑深泉鳴仙梵落月出佛
光臨寥廓生靈氣高寒灑客襟御題光燭夜
朱榜字鐫金

西山還同焦弱侯劉幼安集黃平倩太史
宅

攜得西山雪遙輝白玉堂冰銜清照夜雲液醉
回陽積素疏溫樹苞菁護汶篁探梅還有約馬

首已聞香

偶成

長遊不自意忽已歷三時薄夢情多悔殊方味
少宜興隨燕日澹魂怯朔風吹誰待金門詔東
方正苦飢

飲劉百世所平倩出館見過戲以詩贈黃
精釋因戲答之

虛約驂油壁閒勞引畫輪酒中燕市客夢裏洛
川神講輟金華直歌傳玉樹新君何避宮綵鹿

苑已超真

濟寧趨南徐宿新店

客心貪就近間道尚嫌迂
清濟時當眼嚴霜漸切膚
燈殘寒自照酒惡夜仍沽
歸去扁舟在天應縱五湖

北還過沛

孤城懸大澤芒碭接寒蕪
鶉首傳天策龍顏應帝圖
偶乘赤運起曾兆素靈呼
酒媪仍留客猶能折券無

辛卯除夕客金陵鷺峰六首

家難時時急羈愁歲歲新
渡江仍作客避地嬾逢人
桃葉波通曙椒花酒縕春
故鄉雲物好誰憶在風塵

其二

鳴磬留殘漏添燈趁轉輪
皈依惟有佛憎愛本緣親
歲月隨塵劫香花覓勝因
安能到無事明日卽今旬

其三

我懷非有戀胡爾滯歸辰尚積前春淚逾傷漸
老神宦燕因學廢嫁衛苦貲貧却謝江門草孤
根自發陳

其四

緬思疇昔夜畱度五湖濱在旅寧堪累爲時更
屬屯南圖慙落羽北渚望含顰玠重湘蘭佩歸
來是舊紉

其五

流波君

蜚觀遙臨甲雕盤巧簇辛黛螺餘串翠筆鴈倚

輕璘客采春驚早凝薰夕換頻問年非夙昔相
對掩羅巾

其六

子馬

事歷風華異情來骨肉真在原空爾急往路向
誰遵夢逐將生草魂驚久臥薪屠蘇雖讓少詎
是艷遊身

錢叔問久遊金陵俄從祝髮牽成短什欽
誦勝緣略寓微規兼期精進

頓能憑定力乍可挹清容舍衛家家鉢秦淮寺

寺鐘花飛猶待塵米熟更煩春倘卽乘廬去江
波望幾重

重過虎丘見池上金蓮花開

五湖爲客久一壑繫人思草惑貞娘墓松留短
簿祠風華轉自惜霞賞夙相期獨往猶茲日金
蓮花滿池